

आकाशवाणी

- प्रधानमंत्री ते बीजेपी दे नेता नरेंद्र मोदी होरें आखेआ ऐ जे उंदी सरकार जनजातीय ते आदिवासी लोकें लेई फिक्रमंद ऐ ते इंदे लेई पच्छिम बंगाल च 8 नमें स्कूल खोले गे'न। उनें आखेआ जे इस वर्ग दे महत्व गी उजागर करने लेई उनें जनजातीय गौरव दिवस मनाने दी शुरूआत कीती ऐ।
- केंद्री मंत्री अमित शाह होरें नेशनल कांफ्रेंस, पीडीपी ते कांग्रेस पर फर्जी एन्काउंटर कराने ते कश्मीरी नौजवानें दे हत्थें च बंदूकां फडाने दा दोष लाया ऐ। उनें आखेआ जे जम्मू-कश्मीर च असैम्बली दे चुनांइ इसै बरे कराए जाडन।
- राष्ट्रपति द्रौपदी मुर्मू होरें लोकें दे आर्थिक स्तर गी उबडा चुक्कने लेई डेटा अनेलिसिस ते सबूतें पर आधारित विकास कार्यक्रम लागू करने दी जरूरतै पर जोर भरेआ ऐ।
- भारती जनता पार्टी, बहुजन समाज पार्टी ते आम आदमी पार्टी नै लोकसभा चुनाएं लेई अपने मेदवारें दी इक होर लिस्ट जारी कीती ऐ।
- संघीय लोक सेवा आयोग नै 2023 दे आईएएस मतेयानें दा फाइनल रिजल्ट घोषित करी दित्ता ऐ। प्रधानमंत्री नरेंद्र मोदी होरें एहू मतेयान पास करने आलें गी ममारकबाद दित्ती ऐ।

<><><><><><>

WB-PM

प्रधानमंत्री ते बीजेपी दे सीनियर लीडर नरेंद्र मोदी होरें आखेआ ऐ जे उंदी सरकारै पच्छिम बंगाल च जनजातीय समुदाय दे लोकें लेई 8 नमें जनजातीय स्कूल बनाए न ते इस समुदाय दे महत्व गी समझदे होई इंदे सम्मान च जनजातीय गौरव दिवस मनाने दी परंपरा बी शुरू कीती ऐ। उनें आखेआ जे अज्ज इक आदिवासी महिला मुल्खै दी राष्ट्रपति ना। उनें तृणमूल कांग्रेस पर आरोप लाया जे उन्नै सदा गै जनजातिएं ते आदिवासी समाज पर जुल्म ज्यादतियां कीतियां न, टकोहदा करिए जनजातीय महिलाएं पर। अज्ज पच्छिम बंगाल दे बलूरघाट लोकसभा हल्के दे बलूरघाट रेलवे मैदान च विजय संकल्प जात्तरा गी संबोधित करदे होई मोदी होरें लोकें गी भरोसा दोआया जे सत्ता च औने दे बाद उंदी सरकार लोकें दे घरें छतें पर होर सोलर पैनल लोआग जेदे नै आम लोकें दा बिजली दा खर्चा घट्ट होगा। उनें आखेआ जे उंदी सरकार दा लक्ष्य त्रै करोड नमें मकान बनाइए बेघर लोकें गी देने दा बी ऐ।

<><><><><><>

PM Rally

प्रधानमंत्री ते भारतीय जनता पार्टी दे वरिष्ठ नेता नरेंद्र मोदी होरें आखेआ ऐ जे कांग्रेस ते औदे सहयोगी दल अपने राजनीतिक लाहू आस्तै संविधान गी हथियार आला लेखा इस्तेमाल करने दा जत्त करा रदे ना। बिहार दी गया थाहर गांधी मैदान च इक जनसभा गी संबोधित करदे होई उनें आखेआ जे विपक्षी दलें आस्सेआ लोकें गी गुमराह करने आस्तै एहू झूठ फैलाया जा'रदा ऐ जे भारती जनता पार्टी संविधान बदली देग। उनें भरोसा दोआया जे संविधान गी कोई बी नेई

बदली सकदा। उनें गलाया जे भारतीय जनता पार्टी नै संविधान गी सच्ची भावना कन्नै लोकें तगर पजाने दा जत्न कीता ऐ ते एहदे आस्तै मुल्ख च राष्ट्रीय संविधान दिवस मनाने दी रिवायत शुरू कीती गई ऐ। उनें गलाया जे विपक्ष दे भैडे मनसूबे आले जत्नें गी मुल्ख दी जनता मतदान राएं हराई देग।

<><><><><><>

Campaign 1st Phase

जम्मू खित्ते च लोकसभा चुनावें दे पैहले गेड़ लेई प्रचार जोरें शोरें कन्नै जारी ऐ। बक्ख-बक्ख सियासी पार्टीएं दे नेता अपने अपने मेदवारें दे समर्थन च रैलियां करा रदे न। आकाशवाणी जम्मू संवाददाता दी रिपोर्ट मुजब भारतीय जनता पार्टी दे नेता ते गृह मंत्री अमित शाह होरें जम्मू दी पलोड़ा थाहर चुनावी रैली गी संबोधित कीता। उंदी रैली पार्टी मेदवारें डॉ. जितेंद्र सिंह ते जुगल किशोर शर्मा हुंदे समर्थन च ही। डॉ. जितेंद्र सिंह होर उधमपुर ते जुगल किशोर शर्मा होर जम्मू पार्लिमानी हल्के लेई पार्टी दे मेदवार न। गृह मंत्री अमित शाह होरें जम्मू दे पलौड़ा स्थित मैदान च चुनावी रैली गी संबोधित करदे होई आखेआ जे पिछले 10 बरें च केंद्र च प्रधानमंत्री नरेंद्र मोदी हुदीं अगुवाई आली सरकार नै जम्मू-कश्मीर दे लोकें गी बद्दोबद्द लाहू हासिल करोआया ऐ। उनें आखेआ जे इक समां हा जिसलै जन्नी बट्टे मारना, धमाके ते दफा 370 दे मनहूस साया जम्मू-कश्मीर पर छाए दा हा। हुन इसी हटाई दित्ता गेआ ऐ ते युवाएं दे हत्थें च जन्नी बट्टे दे बजाए लैपटाप न। अज्ज लोक भारत माता दी जय दे नारे लांदे न। पाकिस्तान दे समर्थन च नारे नेई लगदे। उनें आखेआ जे पीडीपी प्रमुख महबूबा मुफ्ती होरें आखेआ हा जे दफा 370 गी जेकर हटाया गेआ तां फीह तिरंगे गी चुक्कने आला कोई नेई रौहग। उनें आखेआ जे दफा 370 बी हटी गई ते तिरंगा पूरी शान कन्नै लहरा रदा ऐ। गृह मंत्री होरें आखेआ जे गुज्जर पहाड़ी, बकरवाल, ओबीसी, दलित ते महिलाएं गी आरक्षण थ्होआ ऐ। उधमपुर पार्लिमानी हल्के च पैहले गेड़ तैहत 19 अप्रैल गी वोट पाए जाने न, जिसले कि जम्मू पार्लिमानी हल्के लेई दुए गेड़ तैहत 26 अप्रैल गी वोट पाए जाने न।

<><><><><><>

Anurag Rally

भारतीय जनता पार्टी दे वरिष्ठ नेता ते केंद्रीय मंत्री अनुराग सिंह ठाकुर होरें किशतवाड़ च इक चुनावी रैली गी संबोधित कीता। उंदी एहू रैली उधमपुर डोडा कठुआ संसदीय हल्के थवां पार्टी दे मेदवार डॉ. जितेंद्र सिंह हुंदे समर्थन लेई ही। प्रसार भारती दे संवाददाता कैलाश नाथ कन्नै खास गल्लबात दौरान अनुराग सिंह ठाकुर होरें आखेआ जे विपक्षी दलें आम लोकें लेई अपने शासन काल दौरान किश नेई कीता। उनें आखेआ जे पिछले 10 बरें दौरान नरेंद्र मोदी हुंदीं अगुवाई आली सरकार दौरान जम्मू-कश्मीर नै हर क्षेत्र च बड़ा मता विकास कीता ऐ। उनें आखेआ जे जम्मू-कश्मीर च विधानसभा चुनावें इस बरे होडन। उनें इस बारै भारतीय जनता पार्टी दे रूख गी दसाफ कीता। उनें विश्वास जाहिर कीता जे औंदे लोकसभा चुनावें दौरान एनडीए गी 400 थवां बद्द सीटां हासिल होडन।

<><><><><><>

Candidates Lists

भारती जनता पार्टी, बहुजन समाज पार्टी ते आम आदमी पार्टी नै औंदे लोकसभा चुनाएं लेई मेदवारें दियां नमियां सूचियां जारी कीतियां ना। पार्टी नै ओडिशा विधानसभा चुनांऽ लेई 21 मेदवारें ते महाराष्ट्र, पंजाब, उत्तर प्रदेश ते पच्छिम बंगाल च लोकसभा चुनाएं लेई 7 मेदवारें दे नाएं दा ऐलान कीता ऐ। आम आदमी पार्टी नै पंजाब च चुनां लेई अपने चऊं मेदवारें दे नां जारी कीते ना। तोआई बहुजन समाज पार्टी नै बी 11 होर मेदवारें दे नाएं दा ऐलान कीता ऐ।

<><><><><><>

Prez. Economy

राष्ट्रपति द्रौपदी मुर्मू होरें आखेआ ऐ जे आंकड़ें दे विश्लेषण ते सबूतें पर आधारित विकास कार्यक्रमें गी लागू करने कन्नै सरकार गी लोकें दे आर्थिक उत्थान च तेजी आनने च मदद थ्होई ऐ। उनें आखेआ जे भारतीय आर्थिक सेवा दे युवा अधिकारिणं दा एहू फर्ज ऐ जे ओहू नमें विचारें ते तकनीकें दे इस्तेमाल कन्नै अपनी कार्य क्षमता बदान। राष्ट्रपति भवन च अज्ज भारतीय आर्थिक सेवा दे प्रोब्रेशनर्स अधिकारिणं दे इक समूह गी संबोधित करदे होई उनें आखेआ जे आर्थिक विकास मुल्ख दे विकास दा महत्वपूर्ण हिस्सा ऐ।

<><><><><><>

SC RamDev

सुप्रीम कोर्ट पतंजली आयुर्वेद दिणं दोआइणं दिणं कथित भ्रम पैदा करने आलिणं मशहूरिणं दे बारै च अवमानना दी अगली सुनवाई 23 अप्रैल गी करोग। अज्ज सुनवाई दौरान योग गुरु बाबा रामदेव ते आचार्य बालकृष्ण मजूद हे। पतंजली आयुर्वेद दे खलाफ भारतीय चिकित्सा संघ नै सुप्रीम कोर्ट च इक अर्जी दाखल कीती दी ऐ। एहूदे शा पैहले 10 अप्रैल गी सुप्रीम कोर्ट नै इस मामले च रामदेव ते आचार्य बालकृष्ण होरें गी बिजन शर्त माफी दी मंग खारज करी दिती ही। अदालतै मामले दी अगली तरीक 23 अप्रैल पाई ऐ।

<><><><><><>

UPSE-Result

संघ लोक सेवा आयोग नै सिविल सेवा परीक्षा 2023 दे नतीजे घोषित करी दिते ना। एहूदे च आदित्य श्रीवास्तव होरें पैहली थाहर हासिल कीती ऐ। ओहू आई.आई.टी कानपुर थवां इलेक्ट्रानिक इंजीनियरिंग कीती दी ऐ। दुई थाहर पर अनिमेष प्रधान ते त्री थाहर पर दोनुरू अनन्या रेड्डी रेड्यां। शीर्ष 25 मेदवारें च 10 महिला ते 15 पुरुष ना। आयोग नै नियुक्ति आस्तै कुल इक ज्हार 16 मेदवारें दे नां दी सिफारश कीती ऐ। इस मतेयान च 6 लक्ख थवां मते मेदवारें हिस्सा लैता हा।

<><><><><><>

PM-Civil Services

प्रधानमंत्री नरेंद्र मोदी होरें सिविल सर्विसेस 2023 दे मतेहानें च सफलता हासल करने आहलें गी बधाई दिती ऐ। सोशल मीडिया दे इक पोस्ट च प्रधानमंत्री होरें आखेआ ऐ जे उंदी मेहनत गी फल मिलेआ ऐ। उनें आखेआ ऐ जे उंदे जत्तें कन्नै औने आहले समें च स्हाढे राष्ट्र दे भविक्ख गी नमां आकार दिता जाग। प्रधानमंत्री होरें उनें मेदवारें जिनें सिविल सर्विसेस दे मतेहान च

सफलता हासल नेई कीती, उनेंगी आखेआ ऐ जे उनें चेता रक्खना लोडचदा जे उंदी यात्रा दा अंत नेई ऐ।

<><><><><><>

Abha-CGHS

सेहत मंत्रालय नै लोके गी आखेआ ऐ जे केंद्र सरकार सेहत योजना रिकार्ड गी आभा नंबर कन्नै जोडने आहली पैहलकदमी दे बारे च गलत जानकारीये गी नेई फैलाया जा। मंत्रालय नै आखेआ ऐ जे इस पैहलकदमी दा मकसद मरीजे ते केंद्र सरकार सेहत स्कीम दे लाभार्थिये गी उंदे मेडिकल रिकार्ड गी उंदे मोबाइले पर उपलब्ध करोआना ऐ। मंत्रालय नै इस गल्लै पर जोर भरेआ ऐ जे आपूं च इनें रिकार्डे गी जोडने कन्नै अस्पताले गी सेहत रिकार्डे गी सांभने आस्ते मुश्कलाते दा सामना नेई करना पौग ते एहदे कन्नै समे ते पैसे दी बरबादी बी नेई होग। मंत्रालय नै इब्बी दस्सेआ ऐ जे सरकार दा छप्पने दा कोई गुप्त मकसद नेई ऐ।

<><><><><><>

IMD-Frest Snowfall

भारतीय मौसम विभाग नै 18 कोला लेइए 21 अप्रैल तोड़ी उत्तर पच्छमी भारत दे केई इलाके च गर्जी चमकिए बरखा बरने ते अंदी झक्खड़ झुल्लने दी पेशनगोई कीती ऐ। जानकारी मुजब कश्मीर घाटी, जम्मू संभाग, लद्दाख, गिलगित, बाल्तिस्तान, मुजफ्फराबाद, हिमाचल प्रदेश ते उत्तराखंड च हल्के कोला दरम्याने दर्जे दी बरखा पौने दे आसार दस्से ना। जिसलै कि पंजाब, दिल्ली, हरियाणा, उत्तर प्रदेश, पच्छमी ते पूर्वी राजस्थान च टामीं-टामीं थारे पर बरखा बरने दा इमकान ऐ। एहदे अलावा मौसम विभाग नै ओडिशा, पच्छिम बंगाल दे गंगा कन्नै लगदे इलाके, उत्तरी कोकण, सौराश्ट्र, तटीय आंध्र प्रदेश ते तेलंगाना च औंदे त्रऊ दिनें तगर गर्म लैहर जारी रौहने दी बी पेशनगोई कीती ऐ।

<><><><><><>